

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সংবাদ, সম্পাদকীয়র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৭৮/২০১৭-১৮

ঢাকা, বুধবার ১৮ অক্টোবর ২০১৭, ৩ কার্তিক ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে:

- ১। রোহিঙ্গা ইস্যুতে ইইউকে পাশে চাইলেন রাষ্ট্রপতি  
ইইউ ও জাপানের নতুন রাষ্ট্রদূতের পরিচয়পত্র পেশ
- ২। ঢাকার আশেপাশে হবে ১০ সরকারি বিদ্যালয় : একনেকে ১০ প্রকল্প অনুমোদন
- ৩। কফি আনানের সঙ্গে স্পিকারের বৈঠক  
রোহিঙ্গা সমস্যা সমাধানে জাতিসংঘকে কার্যকর ভূমিকা রাখার আহ্বান
- ৪। রোহিঙ্গাদের সহায়তায় জাতিসংঘের তিন সংস্থার আন্তর্জাতিক সম্মেলন আগামী ২৩ অক্টোবর
- ৫। রোহিঙ্গা ইস্যুতে বাংলাদেশকে সহায়তা দেবে স্পেন
- ৬। রোহিঙ্গাদের ভাষানচরে স্থানান্তরে সব সহায়তা দেবে আইওএম  
ত্রাণমন্ত্রীর সঙ্গে আইওএম মহাপরিচালকের বৈঠক
- ৭। সব দল যাতে নির্বাচনে আসে ইসিকে সেই ব্যবস্থা করতে বলব : স্বাস্থ্যমন্ত্রী  
ইসির সংলাপে আজ যাচ্ছেন আওয়ামী লীগের ২১ নেতা
- ৮। নারী নির্যাতন, বাল্যবিয়ের বিরুদ্ধে রঞ্জে দাঁড়াতে হবে : স্বরাষ্ট্রমন্ত্রী  
বেগম খালেদা জিয়া দেশে ফিরলে আইন অনুযায়ী ব্যবস্থা
- ৯। সাংবিধানিক পদে অধিষ্ঠিত ব্যক্তিদের রাজনীতি ও ইতিহাস চর্চা না করার আহ্বান তথ্যমন্ত্রীর
- ১০। দুর্যোগপ্রবণ এলাকায় টেকসই বিদ্যালয় নির্মাণ করা হবে : প্রাথমিক শিক্ষামন্ত্রী
- ১১। বঙ্গবন্ধুর কনিষ্ঠ পুত্র শেখ রাসেলের ৫৩তম জন্মদিন আজ
- ১২। ৩৬তম বিসিএসের চূড়ান্ত ফল প্রকাশ ২,৩২৩ জনকে নিয়োগের সুপারিশ  
প্রাথমিকে ৪৭০ নন-ক্যাডার প্রধান শিক্ষক নিয়োগ
- ১৩। ইংরেজি বিষয়ের ক্লাস ইংরেজিতেই নিতে হবে : মাউশি'র আদেশ

১। রোহিঙ্গা ইস্যুতে ইইউকে পাশে চাইলেন রাষ্ট্রপতি

ইইউ ও জাপানের নতুন রাষ্ট্রদূতের পরিচয়পত্র পেশ

রাষ্ট্রপতি মো. আবদুল হামিদের কাছে পরিচয়পত্র পেশ করেছেন ইউরোপীয় ইউনিয়ন (ইইউ) ও জাপানের নবনিযুক্ত রাষ্ট্রদূতগণ। গতকাল (১৭ অক্টোবর মঙ্গলবার) তাঁরা বঙ্গভবনে রাষ্ট্রপতির কাছে পরিচয়পত্র পেশ করেন। এসময় রাষ্ট্রপতি বাংলাদেশে আশ্রয় নেওয়া বাস্তুচ্যুত রোহিঙ্গাদের প্রত্যাবাসনে মিয়ানমারের ওপর চাপ প্রয়োগ অব্যাহত রাখতে ইইউ'র প্রতি আহ্বান জানান। সূত্র-ইত্তেফাক (পৃ.১৫,ক.৮), সমকাল (পৃ.৫,ক.৮), অবজারভার (পৃ.১০,ক.১), নিউজ টুডে (পৃ.৩,ক.২)।

২। ঢাকার আশেপাশে হবে ১০ সরকারি বিদ্যালয় : একনেকে ১০ প্রকল্প অনুমোদন

ঢাকা শহরের নিকটবর্তী এলাকায় নতুন দশটি সরকারি মাধ্যমিক বিদ্যালয় প্রতিষ্ঠা করা হবে। এ লক্ষ্যে ৬৭৩ কোটি ৪৬ লাখ টাকা ব্যয় ধরে একটি প্রকল্প অনুমোদন দিয়েছে জাতীয় অর্থনৈতিক পরিষদের নির্বাহী কমিটি (একনেক)। গতকাল (১৭ অক্টোবর মঙ্গলবার) একনেক চেয়ারপারসন প্রধানমন্ত্রী শেখ হাসিনার সভাপতিত্বে অনুষ্ঠিত একনেক সভায় মোট ১০টি প্রকল্প অনুমোদন দেওয়া হয়। এসব প্রকল্প বাস্তবায়নে ব্যয় হবে ৫ হাজার ৭৮৩ কোটি টাকা। সূত্র-ইত্তেফাক (পৃ.১,ক.৭), যায়যায়দিন (শেষ পৃ.,ক.৬), ইন্ডিপেনডেন্ট (পৃ.৯,ক.১), এশিয়ান এজ (পৃ.১,ক.১)।

৩। কফি আনানের সঙ্গে স্পিকারের বৈঠক

রোহিঙ্গা সমস্যা সমাধানে জাতিসংঘকে কার্যকর ভূমিকা রাখার আহ্বান

জাতীয় সংসদের স্পিকার ড. শিরীন শারমিন চৌধুরী রোহিঙ্গা সমস্যা সমাধানে জাতিসংঘসহ আন্তর্জাতিক সম্প্রদায়কে স্থায়ী ও কার্যকর ভূমিকা রাখার আহ্বান জানিয়েছেন। গতকাল (১৭ অক্টোবর মঙ্গলবার) জাতিসংঘ (ইউএন) সদরদফতরে জাতিসংঘের সাবেক মহাসচিব ও 'এডভাইজরি কমিটি অন রাখাইন স্টেট' এর চেয়ারম্যান কফি আনানের সঙ্গে বৈঠককালে তিনি এ আহ্বান জানান। কফি আনান অবিলম্বে সহিংসতা বন্ধ এবং রাখাইন প্রদেশের উপদ্রুত এলাকাগুলোতে জাতিসংঘ ও মানবিক সহায়তা সংস্থাসমূহ এবং গণমাধ্যমের অবাধ প্রবেশাধিকার নিশ্চিত করার ওপর জোর দেন। সূত্র-সংবাদ (শেষ পৃ.,ক.৩), প্রথম আলো (পৃ.২,ক.২), ইন্ডিপেনডেন্ট (শেষ পৃ.,ক.২), এশিয়ান এজ (শেষ পৃ.,ক.৫)।

৪। রোহিঙ্গাদের সহায়তায় জাতিসংঘের তিন সংস্থার আন্তর্জাতিক সম্মেলন আগামী ২৩ অক্টোবর

মিয়ানমার সেনাবাহিনীর 'এথনিক ক্লিনজিং' এর শিকার রাখাইন থেকে পালিয়ে আসা প্রায় ৬ লাখ রোহিঙ্গার মানবিক সহায়তায় প্রয়োজনীয় অর্থ সংগ্রহের জন্য জাতিসংঘের তিন সংস্থা এক সম্মেলন আয়োজনের সিদ্ধান্ত নিয়েছে। এজন্য আগামী ২৩ অক্টোবর জেনেভায় মানবাধিকার সমন্বয় সংস্থা (ওসিএইচএ), আন্তর্জাতিক অভিবাসন সংস্থা (আইওএম) ও জাতিসংঘের শরণার্থী কমিশন ইউএনএইচসিআর এ সম্মেলন আয়োজন করছে। এ বৈঠকে বিভিন্ন দেশের সরকার বাংলাদেশের সঙ্গে একাত্মতা প্রকাশ করবে। ভাগ করে নেবে দায়িত্ব। সম্মেলনের সঙ্গে সংহতি জানিয়েছে ইউরোপিয়ান ইউনিয়ন ও কুয়েত। জাতিসংঘের ওয়েবসাইটে প্রকাশিত এক বিবৃতিতে এ তথ্য জানা যায়। সূত্র-সংবাদ (পৃ.১,ক.৪), ইত্তেফাক (পৃ.১,ক.৬), ইন্ডিপেনডেন্ট (পৃ.১,ক.১), এশিয়ান এজ (শেষ পৃ.,ক.৭)।

৫। রোহিঙ্গা ইস্যুতে বাংলাদেশকে সহায়তা দেবে স্পেন

ঢাকায় সদ্য নিযুক্ত স্পেনের রাষ্ট্রদূত আল ভারো দ্য সালাস রোহিঙ্গা সংকট সমাধানে বাংলাদেশকে তাঁর দেশের পূর্ণ সমর্থন প্রদানের আশ্বাস পুনর্ব্যক্ত করেছেন। পররাষ্ট্র মন্ত্রণালয়ের এক বিবৃতিতে বলা হয়, পররাষ্ট্রমন্ত্রী এএইচ মাহমুদ আলীর সঙ্গে গতকাল (১৭ অক্টোবর মঙ্গলবার) তাঁর সচিবালয়ের কার্যালয়ে সাক্ষাৎকালে স্পেনের রাষ্ট্রদূত এ আশ্বাস দেন। বৈঠকে পররাষ্ট্রমন্ত্রী পারস্পরিক স্বার্থে বাণিজ্য, বিনিয়োগ এবং অন্যান্য ক্ষেত্রে দ্বিপক্ষীয় সহযোগিতা আরও বৃদ্ধি করার প্রয়োজনীয়তার ওপর গুরুত্বারোপ করেন। সূত্র-সমকাল (পৃ.৫,ক.৮), ইন্ডিপেনডেন্ট (পৃ.১৯,ক.১), অবজারভার (পৃ.৩,ক.৭)।

৬। **রোহিঙ্গাদের ভাষানচরে স্থানান্তরে সব সহায়তা দেবে আইওএম**

**ত্রাণমন্ত্রীর সঙ্গে আইওএম মহাপরিচালকের বৈঠক**

রোহিঙ্গাদের অস্থায়ী কুতুপালং ক্যাম্প থেকে ভাষানচরে স্থানান্তর করতে সবধরনের সহায়তা দেবে আন্তর্জাতিক অভিবাসন সংস্থা (আইওএম)। এছাড়া রোহিঙ্গাদের সহযোগিতায় আইওএম বিভিন্ন দাতাসংস্থার কাছে এক হাজার কোটি টাকা চেয়েছে বলেও জানান ত্রাণমন্ত্রী মোফাজ্জল হোসেন চৌধুরী মায়্যা। হোটেল ওয়েস্টিনে গতকাল (১৭ অক্টোবর মঙ্গলবার) আইওএমের মহাপরিচালক উইলিয়াম লেসি সুইংয়ের সঙ্গে বৈঠক করেন দুর্যোগ ব্যবস্থাপনা ও ত্রাণমন্ত্রী মোফাজ্জল হোসেন চৌধুরী মায়্যা। বৈঠকশেষে তিনি সাংবাদিকদের এসব কথা জানান। সূত্র-সংবাদ (পৃ.১,ক.৪), সমকাল (পৃ.১,ক.২), এশিয়ান এজ (পৃ.১২,ক.১), নিউ নেশন (পৃ.১,ক.১)।

৭। **সব দল যাতে নির্বাচনে আসে ইসিকে সেই ব্যবস্থা করতে বলব : স্বাস্থ্যমন্ত্রী**

**ইসির সংলাপে আজ যাচ্ছেন আওয়ামী লীগের ২১ নেতা**

স্বাস্থ্য ও পরিবার কল্যাণ মন্ত্রী মোহাম্মদ নাসিম প্রধান নির্বাচন কমিশনারকে উদ্দেশ্য করে বলেছেন, এটি একটি সাংবিধানিক পোস্ট। আমরা আওয়ামী লীগের পক্ষ থেকে তাঁকে সুষ্ঠু ও নিরপেক্ষ নির্বাচন আয়োজনের অনুরোধ করব। সব দল যাতে নির্বাচনে আসে সেই ব্যবস্থাও করতে বলব। গতকাল (১৭ অক্টোবর মঙ্গলবার) মহাখালীতে জাতীয় বক্ষব্যাধি ইনস্টিটিউট ও হাসপাতালে সেন্ট্রাল নেবুলাইজার সিস্টেম আনুষ্ঠানিকভাবে উদ্বোধনকালে তিনি এ কথা বলেন। সূত্র-ইত্তেফাক (শেষ পৃ.,ক.১), যুগান্তর (পৃ.২,ক.৪), নিউজ টুডে (পৃ.৩,ক.৫), বাংলাদেশ টুডে (পৃ.৩,ক.৬)।

আওয়ামী লীগের সাধারণ সম্পাদক ওবায়দুল কাদেরের নেতৃত্বে ২১ সদস্যের প্রতিনিধিদল আজ (১৮ অক্টোবর বুধবার) নির্বাচন কমিশনের সঙ্গে সংলাপে বসতে যাচ্ছে। ক্ষমতাসীন দলটি নতুন করে সংসদীয় আসনের সীমানা পুনর্বিন্যাস না করা, ইভিএম চালুসহ ১১ দফা প্রস্তাব দেবে। বেলা ১১টায় প্রধান নির্বাচন কমিশনার (সিইসি) কে এম নুরুল হুদার সভাপতিত্বে এ সংলাপ শুরু হবে। সূত্র-যুগান্তর (পৃ.১,ক.১), প্রথম আলো (পৃ.২,ক.২), নিউ নেশন (পৃ.১২,ক.২), অবজারভার (পৃ.১,ক.৬)।

৮। **নারী নির্যাতন, বাল্যবিয়ের বিরুদ্ধে রুখে দাঁড়াতে হবে : স্বরাষ্ট্রমন্ত্রী**

স্বরাষ্ট্রমন্ত্রী আসাদুজ্জামান খাঁন কামাল বলেছেন, সরকার নারীর প্রতি সহিংসতা রোধে আইন প্রণয়ন, নীতিমালা তৈরিসহ নারীর পক্ষে কাজ করছে। তবে আইন প্রণয়ন করে নারী নির্যাতন বন্ধ করা যাবে না। নারী নির্যাতন সামাজিক ব্যাধি, এ ব্যাধির বিরুদ্ধে রুখে দাঁড়াতে হবে সবাইকে। যখন যেখানেই নারী নির্যাতন, বাল্যবিয়ে, অন্যায় দেখবেন সেখানেই রুখে দাঁড়ানোর আহ্বান জানিয়েছেন স্বরাষ্ট্রমন্ত্রী মো. আসাদুজ্জামান খাঁন। নারীর যৌন ও প্রজনন স্বাস্থ্যবিষয়ক সব ধরনের নির্যাতনকে বন্ধ করতে এবং নারীর অধিকার সমুল্লত করার লক্ষ্যে

আমরাই পারি পারিবারিক নির্যাতন প্রতিরোধ জোটের আয়োজনে এম্বেসি অব দ্য কিংডম অব দ্য নেদারল্যান্ডসের আর্থিক সহায়তায় 'সখি' প্রকল্পের আওতায় গতকাল (১৭ অক্টোবর মঙ্গলবার) বাংলা একাডেমিতে 'নারীর অধিকার (যৌন ও প্রজনন স্বাস্থ্য) বিষয়ক জাতীয় সম্মেলন ২০১৭' অনুষ্ঠানে স্বরাষ্ট্রমন্ত্রী এ আহ্বান জানান। সূত্র- জনকণ্ঠ (পৃ.৩,ক.৪), প্রথম আলো (পৃ.৪,ক.২)।

#### ৯। সাংবিধানিক পদে অধিষ্ঠিত ব্যক্তিদের রাজনীতি ও ইতিহাস চর্চা না করার আহ্বান তথ্যমন্ত্রীর

তথ্যমন্ত্রী হাসানুল হক ইনু সাংবিধানিক পদে অধিষ্ঠিত ব্যক্তিদের রাজনীতি ও ইতিহাস চর্চা না করার পরামর্শ দিয়ে বলেছেন, সাংবিধানিক পদধারীরা ইতিহাস ও রাজনীতি চর্চা করবেন না। প্রধান নির্বাচন কমিশনার (সিইসি) জানিয়েছেন, জিয়াউর রহমান বহুদলীয় গণতন্ত্রের প্রবক্তা। কিন্তু আমি বলতে চাই, জিয়াউর রহমান সামরিকতন্ত্রের প্রবক্তা। গতকাল (১৭ অক্টোবর মঙ্গলবার) সচিবালয়ে তথ্য অধিদফতরের সম্মেলনক্ষেত্রে আয়োজিত সংবাদ সম্মেলনে তিনি এসব কথা বলেন। সূত্র-যুগান্তর (পৃ.৩,ক.১), জনকণ্ঠ (পৃ.১,ক.৪), অবজারভার (পৃ.৪,ক.১), ডেইলি সান (পৃ.২,ক.৬)।

#### ১০। দুর্যোগপ্রবণ এলাকায় টেকসই বিদ্যালয় নির্মাণ করা হবে : প্রাথমিক শিক্ষামন্ত্রীর

প্রাথমিক ও গণশিক্ষামন্ত্রী এডভোকেট মোস্তাফিজুর রহমান বলেছেন, দুর্যোগপ্রবণ এলাকার জন্য টেকসই মানের বিদ্যালয় নির্মাণ ও যোগাযোগব্যবস্থার উন্নয়নে কাজ করছে সরকার। আজকের শিশুরাই আগামীর নেতৃত্বে থাকবে। ২০২১ সালে মধ্যআয়ের ও ২০৪১ সালে উন্নত রাষ্ট্রে পরিণত হওয়ার লক্ষ্যে আমরা এগিয়ে যাচ্ছি। এ লক্ষ্য অর্জন করতে হলে কোনো শিশুকেই উপেক্ষা করার অবকাশ নেই। গতকাল (১৭ অক্টোবর মঙ্গলবার) রাজধানীর শিশু একাডেমির লেকচার থিয়েটার হলে 'দুর্যোগ ও আমরা' বিষয়ক এক বিশেষ অধিবেশনে প্রধান অতিথির বক্তৃতায় তিনি এসব কথা বলেন। বেসরকারি আন্তর্জাতিক সংস্থা সেভ দ্য চিলড্রেন বাংলাদেশ ও প্ল্যান ইন্টারন্যাশনাল বাংলাদেশ আয়োজিত এ অনুষ্ঠানে দেশের বন্যাকবলিত ৩১টি জেলার চাইল্ড পার্লামেন্ট সদস্যরা উপস্থিত ছিলেন। সূত্র-যুগান্তর (পৃ.১৬,ক.৬), সমকাল (পৃ.৩,ক.১)।

#### ১১। বঙ্গবন্ধুর কনিষ্ঠ পুত্র শেখ রাসেলের ৫৩তম জন্মদিন আজ

স্বাধীনতার স্থপতি জাতির পিতা বঙ্গবন্ধু শেখ মুজিবুর রহমানের কনিষ্ঠ পুত্র শহিদ শেখ রাসেলের ৫৩তম জন্মদিন আজ। ১৯৬৪ সালের ১৮ অক্টোবর ধানমন্ডিস্থ বঙ্গবন্ধু ভবনে তিনি জন্মগ্রহণ করেন। ১৯৭৫ সালের ১৫ আগস্ট ঘণ্য ঘাতকদের নির্মম বুলেটের হাত থেকে রক্ষা পাননি বঙ্গবন্ধুর এ শিশুপুত্র শেখ রাসেল। জাতির পিতা বঙ্গবন্ধু শেখ মুজিবুর রহমানের সঙ্গে নরপিশাচরা নিষ্ঠুরভাবে তাঁকেও হত্যা করেছিল। শহিদ শেখ রাসেলের জন্মদিন উপলক্ষে আওয়ামী লীগ আজ (১৮ অক্টোবর বুধবার) সকাল ৮টায় বনানী কবরস্থানে চিরনিদ্রায় শায়িত ১৫ আগস্টে নিহত সব শহিদদের কবরে পুষ্পস্তবক অর্পণ, ফাতেহা পাঠ, মিলাদ ও দোয়া মাহফিলের আয়োজন করেছে। পাশাপাশি আওয়ামী লীগের সহযোগী, ভ্রাতৃপ্রতিম-সংগঠন এবং বিভিন্ন সামাজিক ও সাংস্কৃতিক সংগঠন বিভিন্ন কর্মসূচি গ্রহণ করবে। সূত্র-ইত্তেফাক (শেষ পৃ.,ক.১), যুগান্তর (পৃ.২,ক.১), ইন্ডিপেন্ডেন্ট (পৃ.২,ক.১), নিউ নেশন (পৃ.৩,ক.৪)।

#### ১২। ৩৬তম বিসিএসের চূড়ান্ত ফল প্রকাশ ২,৩২৩ জনকে নিয়োগের সুপারিশ

প্রাথমিকে ৪৭০ নন-ক্যাডার প্রধান শিক্ষক নিয়োগ

গতকাল (১৭ অক্টোবর মঙ্গলবার) ৩৬তম বিসিএসের চূড়ান্ত পরীক্ষার ফল প্রকাশ করেছে সরকারি কর্মকমিশন (পিএসসি)। এতে সংস্থাটি দুই হাজার ৩২৩ জনকে বিভিন্ন ক্যাডারে নিয়োগের সুপারিশ করেছে। মোট উত্তীর্ণ হয়েছেন পাঁচ হাজার ৬৩১ জন। আগামী সপ্তাহে ৩৭তম বিসিএসের লিখিত পরীক্ষার ফল প্রকাশ

করতে যাচ্ছে সরকারি কর্মকমিশন। সূত্র-সংবাদ (পৃ.১,ক.১), ইত্তেফাক (পৃ.১,ক.১), ইন্ডিপেনডেন্ট (পৃ.২,ক.৬), এশিয়ান এজ (পৃ.১,ক.৬)।

সরকারি প্রাথমিক বিদ্যালয়ের প্রধান শিক্ষক হিসেবে ৩৪তম বিসিএস পরীক্ষায় (পদস্বল্পতার কারণে ক্যাডার পদ না পাওয়া) ৪৭০ জন নন-ক্যাডারকে নিয়োগ দিয়েছে সরকার। এই শিক্ষকদের নিয়োগ দিয়ে দেশের বিভিন্ন বিদ্যালয়ে পদায়ন করেছে প্রাথমিক ও গণশিক্ষা মন্ত্রণালয়। গতকাল (১৭ অক্টোবর মঙ্গলবার) এ সংক্রান্ত প্রজ্ঞাপন জারি করে গণশিক্ষা মন্ত্রণালয়। সূত্র-সংবাদ (পৃ.১,ক.৩), যায়যায়দিন (শেষ পৃ.,ক.৫)।

### ১৩। ইংরেজি বিষয়ের ক্লাস ইংরেজিতেই নিতে হবে : মাউশি'র আদেশ

দেশের সব সরকারি-বেসরকারি স্কুল ও কলেজে ইংরেজি বিষয়ের ক্লাস ইংরেজিতেই নেওয়ার নির্দেশ দিয়েছে মাধ্যমিক ও উচ্চশিক্ষা অধিদপ্তর (মাউশি)। এ ছাড়া প্রত্যেক শিক্ষার্থীকে দেশপ্রেমিক ও নৈতিক মূল্যবোধসম্পন্ন হিসেবে গড়ে তোলার জন্য নৈতিকশিক্ষা প্রদান ও মুক্তিযুদ্ধের সঠিক ইতিহাস তুলে ধরতে নির্দেশ দেওয়া হয়েছে। গতকাল (১৭ অক্টোবর মঙ্গলবার) মাউশি এ সংক্রান্ত এক আদেশ জারি করে। সূত্র-সমকাল (পৃ.৪,ক.১)।

### সম্পাদকীয়

- ক. **ইত্তেফাক** : প্যালিয়েটিভ কেয়ার কঠিন ও নিরাময়অযোগ্য রোগে আক্রান্ত রোগীদের জীবনে স্বস্তি এনে দেওয়ার বিষয় তুলে ধরে বেসরকারি খাতে এ ধরনের চিকিৎসাসেবা সহজলভ্য করতে সরকারকে উদ্যোগ নেওয়ার আহ্বান।
- খ. **সংবাদ, যুগান্তর, জনকণ্ঠ, ইন্ডিপেনডেন্ট, ডেইলি সান, ডেইলি স্টার** : রোহিঙ্গা সমস্যা সমাধানে মিয়ানমারের ওপর আরও আন্তর্জাতিক চাপ বাড়ানো অপরিহার্য বলে অভিমত।
- গ. **জনকণ্ঠ** : নারী নির্যাতনের অভিযোগে দায়ী ব্যক্তিদের যথাযথভাবে আইনের মাধ্যমে শাস্তি নিশ্চিত করার প্রত্যাশা।
- ঘ. **প্রথম আলো** : টাঙ্গাইলের মির্জাপুরে বংশাই ও ঝিনাইনদ থেকে বালু তোলায় নদের ভাঙনে যেভাবে রাস্তা ও ফসলি জমি বিলীন হচ্ছে তাতে উদ্বেগ প্রকাশ করে অতিদ্রুত অবৈধভাবে বালু তোলা বন্ধে উদ্যোগ নেওয়ার সুপারিশ।
- ঙ. **সমকাল** : ঢাকায় স্থায়ী বাসিন্দা ছাড়া জন্ম সনদ না দেওয়ার বিষয়ে প্রকাশিত প্রতিবেদনের বিষয় তুলে ধরে যেখানে জন্ম সেখানেই নিবন্ধন এ ভিত্তিতে জন্মসনদ প্রাপ্তির পত্রিয়া সহজ করা উচিত বলে অভিমত।
- চ. **ইন্ডিপেনডেন্ট** : মানসম্পন্ন উচ্চশিক্ষা নিশ্চিত করতে শিক্ষাপ্রতিষ্ঠানে যোগ্যতাসম্পন্ন উপযুক্ত শিক্ষক নিয়োগ দেওয়াসহ শিক্ষকদের কোচিং বাণিজ্য ও শিক্ষাপ্রতিষ্ঠানে পার্ট-টাইম শিক্ষক নিয়োগ বন্ধের ব্যবস্থা করার আহ্বান।
- ছ. **ডেইলি সান** : দেশের গৌরবময় মুক্তিযুদ্ধের স্মৃতিবিজড়িত ৩৬০টি স্থানের যথাযথ রক্ষণাবেক্ষণের কাজে সংশ্লিষ্ট কর্তৃপক্ষকে সর্বোচ্চ গুরুত্ব দেওয়ার সুপারিশ।
- জ. **নিউ নেশন, নিউজ টুডে** : দেশের সাধারণ জনগণের খাদ্যনিরাপত্তা নিশ্চিত করতে প্রয়োজনীয় খাদ্য সামগ্রীর মূল্য নিয়ন্ত্রণে রাখার ওপর গুরুত্বারোপ করে সম্পাদকীয় প্রকাশ।

### উপ-সম্পাদকীয়

বণিকবার্তা পত্রিকায় প্রকাশিত কলামে শ্রমিক সাধারণের স্বার্থে বাংলাদেশের অর্থনৈতিক প্রবৃদ্ধির কৌশল জরুরিভিত্তিতে পুনর্বিবেচনা করা উচিত বলে উল্লেখ করা হয়েছে।

## নিবন্ধ ও ফিচার

সংবাদ পত্রিকায় প্রকাশিত 'নদী পর্যটনেও থাকুক মনোযোগ' শিরোনামের নিবন্ধে নদীসুরক্ষাবিষয়ক নানা উদ্যোগের ফলে মানুষের মাঝে নদী দেখার প্রবণতা বৃদ্ধি পাওয়ায় দেশে নদীকেন্দ্রিক পর্যটন ক্রমে বাড়ছে বলে অভিমত প্রকাশ।

#

ফাহিমা/মরজিনা/রশীদ/তানিয়া/২০১৭/৯.০০ঘন্টা